

PENGENALAN

Penyelidikan merupakan salah satu aktiviti penting Universiti di samping pengajaran dan pembelajaran. Sejak tahun 2000, USM telah mengambil langkah proaktif dan produktif untuk berubah kepada Universiti Penyelidikan yang dihormati dengan memberi tumpuan kepada penyelidikan yang dapat meningkatkan kesejahteraan dan kebajikan ekosistem manusia. Universiti Sains Malaysia juga telah menumpukan usahanya kepada pengembelian tenaga penyelidikan daripada pelbagai disiplin pengajian merentasi kepakaran, pusat pengajian dan jabatan. Dalam usaha meningkatkan aktiviti penyelidikan, USM telah menubuhkan 13 Pusat Kecemerlangan, dimana empat (4) daripadanya iaitu Pusat Kawalan Doping, Pusat Racun Negara, Institut Penyelidikan Pendidikan Tinggi Negara dan Pusat Penyelidikan Arkeologi Malaysia telah diiktiraf sebagai pusat penyelidikan peringkat kebangsaan.

Geran Penyelidikan yang diterima USM dari pelbagai sumber, iaitu kerajaan, pihak swasta dan badan antarabangsa telah meningkat dari RM 16.0 juta pada tahun 2004 kepada RM75.0 juta dalam tahun 2007. Pengiktirafan Universiti Sains Malaysia sebagai Universiti Penyelidikan dan seterusnya Universiti APEX telah meningkatkan aktiviti penyelidikan secara keseluruhan. Bilangan projek penyelidikan telah meningkat sebanyak 58.76 % iaitu dari 1,489 pada tahun 2006 (sebelum pengiktirafan sebagai Universiti Penyelidikan) kepada 2,364 pada tahun 2008.

Dengan peningkatan geran dan aktiviti penyelidikan di USM, satu panduan pengurusan kewangan diperlukan bagi membantu dan memudahkan penyelidik serta staf sokongan yang terlibat dalam aktiviti penyelidikan. Pihak Jabatan Bendahari telah mengambil inisiatif untuk menyediakan satu garis panduan berhubung peraturan dan tatacara kewangan yang berkaitan. Garis panduan ini memberi penekanan kepada pengurusan kewangan penyelidikan yang merangkumi aspek belanjawan, perolehan, perbelanjaan dan perakaunan / pelaporan geran penyelidikan.